

雅宜山人集卷九

明吳郡王寵賦撰

賦頌序扣

迎春賦

欣陽和之迴馭穆上皇於東方
瞻坤河以占氣
兔朝霽而蒼蒼澹萬里之風煙
靄容與而含光
何芳春之乍臨而膏沐之滂汪也
於時皇風載夷長吏崇規矧三吳之靈境表都會於南陲山川環帶風氣華靡百花洲上春雲麗烏鵲橋邊春日遲春雲春日共交輝無數樓臺向景披紛

雅宜集九

九衢之紆直貫金城而交馳抗飛梁於螭首跨
綠水之逶迤若個陌頭無擁固若個遊人不解
眉共傳春色天涯至爭道春光今日宜龍嚼寶
勝飛雙隊鳳吐流蘇拂四垂粲綵花之歷亂紛
羅葉之葳蕤窮剪綴於萬態絢丹碧之陸離玉
斂弄影娉婷女紈袴棲香輕薄兒高調遏雲而
羣奏繁絃應手以逞奇莫不目眩神竦耳觸心
悲則有王孫接騎公子交嬉千金換馬尾搖絲
入寶裝鞍光照地飛鞭誤觸綺羅車敲鐙誰知
臺府吏慕鴛鴦之野偶願鸞皇而接翅弄袖救

妍傾身佯醉異目成之我與又恍惚而靡遂雲
開朱閣對芙蓉日射彤簾藏翡翠芙蓉翡翠一
時新總是江東絕世人動館娃之春思慕西子
之芳塵蟬髻新傳宮掖樣雲光恰似洛波神每
嬌羞而掩態或搖曳以呈身翩翩飛燕能輕舉
嬈嬈遊龍不可親默含情而未吐恨鬱思以何
伸祖道春歸春意濃寧知春到春心亂嘆佳期
之寂寞悲年華之屢換朝朝璫圍愛花開夜夜
蘭堂看月滿花月娟娟能幾時榮華冉冉嗟將
半信春思之飄揚亦春愁之瀰漫年年風景倍
傷春歲歲彫零無故伴於是僕本賤人沉淪江
海見沙際之春歸驚天南之歲改紫禁春光不
可攀朱顏春色那能待悵日月之易道撫功名
之安在齊雲樓下幾逢春祖是當年原憲貧差
池春羽慙黃鳥憔悴春衣懸紫鷄吁嗟乎弱柳
絲絲拂建章宮花朵艷長楊人生不及春花
柳長得天池繞鳳皇

觀物賦

家兄有金鑪朱几各一予觀而愛之因命賦焉

其辭曰

信茲物之佳麗超羣美而莫當液金精以鍊質
騁寶刀而呈祥文章並發規矩齊良爾其委蛇
甲帳燕寢洞房或玄談於素室亦雲會於朱堂
隨宜不滯應用無方薦右座之錦席飄南海之
奇香丹敷掩色紫蘭罷芳瑤華之噐君子之光

參差賦

余聞玉卿子美文子壽奉皆善吹簫賦以贈之
曰

彼江南兮紫管洞罕節兮條道提會合兮象牙
爛朱脣兮金鍤承公子兮光御發宮商兮清秋

雅宜集九

三

羗明月兮翔東美要眇兮雲中攜佳人兮燕後
宮臨曲池兮伏丹櫺吹激楚兮順揚風霓裳飄
飄兮鸞皇若逢紛余去故而就新兮四海焉窮
蹇誰留兮中止忽婉孌兮聲靡眷寶結兮同心
矢借老兮君子終啾啾兮縱所之朱顏倏忽兮
能不悲人生幾何兮朝露晞歡樂不常兮日月
馳安得千秋兮永若斯亂曰繁音促薄兮蕩人
心罔象相求兮窮高深神歸來兮勿周章彷徨
四出兮恐弗勝聊逍遙兮澹容與哀中則兮樂
不淫

感舊賦

正德辛未寵師事林屋先生于包山精舍凡再閱暑寒而退迄今庚辰八年于茲矣乃復來山中作感舊賦其辭曰

紛余慕夫好修兮潛大道以游神濟江河之浩
漾兮悵欲渡而無津彼哲匠之巍峩兮揭日月
于八垠折疏麻之瑤華兮將以贈夫斯人亟恟
怳而仰鑽兮又靡知其所止紛蚪龍之下上兮
尺蠖蟠旋于泥滓車旣怠而馬煩兮阻山川而
徒倚忽日月之我適兮去冉冉而不已經疇昔

大雅集九

四

之故居兮志歔憾而顙泚漉淹留以無成兮將
復修吾初服佩長劍之陸離兮冠切雲而轟轟
民生各有所樂兮放吾道于空谷吸朝霞以爲
粢兮夕復飡夫秋蘄苟矩矱之攸存兮異來者
之可追吾令羲和弭節兮將以窮乎我師路曩
曩其阻修兮殫吾生以求之亂曰駿駢斯皇莫
予好也洵彼前修爲我導也海嶽嶄巖何當造
也長夜漫漫志懣躁也矢心白日遵長道也

拙政園賦

侍御王公敬止卅吳人也寓籍于燕弱冠登進

士官侍御史出按遼陽以不阿法抗中貴謫上
杭丞再承峴之都許驛徙知永嘉判高州竟致
官歸吳焉公疏朗峻潔博學能文辭遇事踔發
當 孝宗朝我冠簪筆儼然柱下有古直臣風
一不當當路意三投炎海折翼而下可畏哉戒
途之難也公則蒞焉若遺逍遙以嬉乃築室閭
閻之城背解市面水竹斬蕪糞菴取勝自然頗
愛潘安仁閑居之篇附于拙者之政寵遂賦之
以誦厥事焉其詞曰緊蹇蹇之王臣秉靖恭於
爾位企遐風於往哲干青雲而高議際明時以

自奮謂諤諤其無忌冠切雲而直指惟一人之
余媚鎔鄒利而鈇刀揮毛嬙都而嫫母恚信人
情之翩翩寵愛累其奚自睇天門之遙遙臣得
罪而遠去信犬吠而掉尾虎磨牙而蹲踞快一
斤之不復薄炎荒而窮馭占巫咸兮則曹決唐
生之猶豫爾乃稅鞅故國徊翔首丘豈宇宙之
迢遙何余栖栖而倦游我陰有廬我耕有疇彼
季子之奚人逃卷衣於長洲洵伯通之不羈賦
五噫而聿道經山川之故墟眷君子而夷猶撫
嘉木之翁翳接吳會之長流羅以爲囿言旋于

休乃有滄浪之池夢隱之樓臺以遐觀堂則若
墅竹栢得真橘柚皇封郁李張梨櫻胡棠棣齒
茗茶糜丹爪綠芋華實駢羅溝塍錯互於是風
妍景熙六合澄朗時鳥變聲鮮雲如掌曳山簡
之接羅披王恭之鶴氅良儔言集恣意偃仰修
山陰之故事和蘇門之遺響朱果在摘頰鱗挂
罔醅醖載浮圖書弘敞信巧拙之何居澹玄心
於天壤眇鴻飛之冥冥知下上之決濬彼爰居
之逍遙奚鐘鼓之爲響吸元化以潛神漱瑤津
而獨往永寤歌於聖明錫萬年之鳩杖

送大學士延陵吳公履巽還朝頌

朝頌

遙遙延陵千禩篤禘有聿其興作我明輔我
輔伊何峻德以升維鼎有鉉天子所馮維北
有斗元氣酌斟掌制代貢式玉式金臣拜稽首
籲天而呼臣則何能先臣是謨襲訓蹈方以幸
無辜祿弗代養臣心如劔有最者原文走兔狐
乞臣之身我糞我驅帝曰咨嗟若痾在余汝
往欽哉端而來而爾書煌煌相臣啓行其從如
雲東南千征祖考咸喜孝孫靖止神旗豹尾六
轡耳耳天平之阡其氣鬱葱翁仲石馬有光如

虹日吉辰良協干蒼龜鳩我祝宗麗牲于碑
孫來享載弁球球肩膺胎骼邊劍以羞有玄有
清其酒思柔降登受昨賚爾思成翼翼孝孫維
王之楨錫之萬年秉國持衡爾駕爾車天子
爾思孝孫稽首握鬯涕洟豈不永懷畏此簡書
肅我徒旅敢違寧居前驅舉燧後乘抗旌注心
紫闥結慮承明如渴如飢軼我皇情胡不夙夜
僕臺倍程維我相臣既孝既忠秉心塞淵以奏
膚公孰不有君孰不有父允矣哲人萬邦作矩
昔周之宣爰有吉甫燕喜孝友載歌于雅於恭
我明主聖臣良穆穆皇皇于周有尤小子作頌
誕告多方

方齋袁君六十壽頌

嘉靖丁亥方齋袁君年既六十其子袞與寵同
學書相愛徵所以壽君者於寵君少時與家大
人同學於張先生氏絕相愛也家大人嘗言君
之雅馴自童已超儕輩遠甚同學生不下數十
百人獨君爲高第弟子巉巉翼翼同學生皆嚴
事之惟謹稍長卽把握門戶以儒行飾賈業頗
事廢舉操奇累贏乘時變化有計然之畫以故

費用鼎盛而君獨晏如雍容談詠不礙圖史中
歲仕爲崑山監學訓科即謝去事母極孝與弟
懷雪君雖白首猶如童時下上出入怡怡也可
謂敦嫻孝友篤行君子者矣有子二人從子四
人皆峻挺竒拔鵠峙鸞翔古之八荀五竇莫可
儔焉維君蘄立夙成劫劫自斟葆光蓄祉以庥
後昆天之所以申錫於君者焉可涯已是宜頌
頌曰

河流經天崑崙吐之有粲琳琅藍田沃之天錫
玄宗維君鍾之君鍾維何亦旣孝友奮自童髫

大雅集卷九

八

要于白首娟潔好修握我璫玖玉立而顧野鶴
昂昂魁殊秉哲百夫之良如壙斯崇如棟斯強
載拓高門閎譽騰翔羣髦挺發振振麟趾神啓
其胄享有多子駿躍天衢一日千里袞袞公疾
爰卜其始繫君之遺碩大迺延辟彼良農薦藜
寔先食報于德於萬斯年彼蒼可徵燭微洞玄
豈曰難諶仁者獲焉小子作頌敢告司筵

秦漢文序

嘉靖癸未天水可泉先生來刺我邦憲古振文
式崇化本數進諸生館下追琢龔厲範以矩矱

越明年出所編次秦漢文授之讀既受卒業寵
踞而請曰是編何居先生曰五經其炳矣日月
宇宙弗可湮已近古而闕麗者其秦乎其漢之
西京乎今士以文進古之制也而業之者弗古
是程吾惑焉攬撫經傳苟以徼于有司其尤疵
者口耳乎帖括剽裂乎佔俾秦與漢無庸及焉
吾怪其涉之流而不飲其源也將浚之使遂闢
之使廓而毋用是譏譏促數也文其有倡乎寵
曰然則左傳國語尚已何遺焉先生曰左傳國
語其旨奧其辭簡其爲書也聯屬而成章經之

翼也小子識之爾烏得而選諸寵曰然則西山
真氏之所輯者不旣躋乎先生曰夫文也終始
有體節奏有變繁簡有裁經緯有章辟之樂焉
一音弗備樂弗諧矣吾竊疑其析而不屬也離
而不理也懼學者之窺其一而遺其二也寵曰
然則東京以後不亦有可錄者乎先生曰氣未
見其渾也體未見其雅也間有之吾懼學者之
作法於京也故略而僅存焉寵旣聞命爲之刊
其訛而是正之郡人湯氏愿而好修請以梓梓
成寵敬以所聞者載諸首

送大司寇蒲田林公還闕序

正德辛巳 今天子既嗣大歷服曰咨宰臣天
既命予有家亦賚予良弼越在閩粵之野茲惟
共工乃諧僉曰休哉則使使自京師東南馳數
千里起家拜公爲工部尚書嚴督之駕公䟽辭
天子弗允再䟽辭再弗允連三䟽辭黼席益仄
使節交至越明年嘉靖壬午公力疾驅道遷刑
部尚書俾帥若屬以掌邦禁居無何公謁告入
乞身于朝 天子挽之益牢公弗克起又明年
癸未七月上可公行於是天下之士相與議公

大雅集卷九

之出處臆決唱聲各持一談曰方今天下皆進
而公獨矯之以退天下皆園而公獨斲之以方
要亦異夫人而已矣則又曰君仁臣恭禮之經
也一龍一蛇時之化也公何心哉其視天下如
浮雲之飛揚往來於太虛也而天下望之如鳳
皇之翔于千仞搏扶搖而弗下也公何心哉之
二者皆非也公之心天下之心也夫自結髮入
朝弼亮三世德邵功焯屹爲元臣既卷而懷王
鼎重輕徜徉海隅以俟其清既而際明君履文
石斡旋天機經緯六符調之齊之大羹其和迪

我高后繼明緝熙千載一時也而公豈自失厥會躋高尚之名而薄金匱之業哉故曰之二者皆非也繫公之行殆必有掣干事而局于時者矣掣則肘不可以運掌局則道不足以廣謀孔孟其猶病諸而獨今之君子乎此所以不得已而行而不能以三年淹也寵不佞何足以窺公而衆言淆亂敢以是折衷焉謹序

送天水胡公序

叙曰自秦郡縣天下而有郡縣吏秦吏大抵皆酷也漢良吏爲盛班固氏傳循酷而吏道備矣

雅集九

十一

余讀循吏傳論考其世未嘗不喟然嘆也蓋鈎姦擿伏取威討聲赫赫乎若揭日月而行者世所稱良也至若風學敦禮植本培化使民回心而嚮道漢吏亦無幾焉夫以循名者猶然而況其下乎我皇明受命溥將疆理萬國循吏如林然窘於期會書牒者繁焉故聖人作而化窒禮樂衰而風微薦紳先生所扼腕也嘉靖癸未吾師天水胡公自皖守徙吳吳啓於秦伯春秋時有季札子游輩興故其民以廉讓文學相高猶有先王風也然瀕海下濕土浮而民情卒難帖

服亦其地然也公下車葺泰伯之宮崇子游之祀廣厲學宮躬帥諸生習射鄉冠祭之禮飭匏絃管祝金玉之噐磬折盤辟示以揖讓執經講解與相問難酬荅褒其異者降爲主客之儀不暮月而吳之風泱泱矣夫吳號難治以金穀溢騰賓傳狼藉吏隸舞法誚刺叢興也而教化獨闕焉豈非隆本抑末顛倒無當哉公超然遠覽獨追古之人而與之上下摹畫奮以泰伯子游爲必可師而進我吳千三代之列故化易行而功則倍信道不惑之驗彰明也使吏天下郡縣者皆如吏吳之吏王道感矣迺夫廉以遠利明以讞獄詳以理賦嚴以警姦儉以節費恤以柔民皆炳然爲天下稱葢而求所以綱維鼓運回斡轉易則唯古之道也故略而弗著焉乃丁亥之秋 聖天子擢公爲山東左參政吳民丁壯號哭老人兒啼曰公去我乎民將安歸於是其門人王寵識公爲政之大者以序其行以爲他日傳循良者告也

送王子祿之會試詩序

尸子曰凡水其方折者有玉其真折者有璣也

蓄寶之淵必異常流彼漫渙而崩奔者是礫石
也已故寶彰于蓄士見于歲豈待登清廟綴玄
冕而後窺其景曜坐明堂籌紫幄而後挹其風
槩哉王子祿之產于名家胚胎前光出遊鉅人
斧藻令德羈貫隸學官弱冠舉于鄉聲華漸起
顯庸可俟王子方挾冊從諸生講受侷侷翼翼
矩折規旋濯纓清流掃軌塵雜汎濫羣籍操追
古人視世之穢汙渙忍不啻鷓雛之騰于九霄
而下睨鴟鳶也卽使王子服官盛時鵠起當路
其必爲矯矯激揚玉潔珠光而不爲脂韋突梯
自混瓦礫斷斷明矣歲己丑天下士羣試禮部
王子以戊子嘉平月先事北征告別于嘗所來
往各爲歌詩以贈之余與王子有一日之長偕
引首篇易不云乎素履往無咎王子慎之哉

送給事中陸君浚明校文還朝序

嘉靖戊子 皇帝履大寶之七載也天下士當
羣比于鄉廷臣建議以人才國家所急而烝自
有司匪明匪慎峻良曷登請以京朝官典文衡
便制曰可于是工科給事中吳郡陸君浚明承
命典制之試事事竣還朝其游王寵揖而祝之

曰給事 天子肘腋臣也典文重寄也溯天下
名藩也是三者世所華豔焉而萃之手君君自
諸生卓犖淵偉已隱然望東南既連起危科讀
書中秘天下想聞其風聲以是握鑑而照操衡
而度測之士無留良矣休哉乎陸君寵竊聞之
上臣事君以人其次以身以身者一世之臣也
以人者百世之臣也然惟宰相爲能以人唯有
司爲能以人有司羅天下之才以致之宰相宰
相度德程能以詔王廢置而布在庶官庶官以
和百揆以序是宰相與有司之權鈞重也卽有

司非明且慎焉天下之才不必盡得相雖聽聽
於上無能爲也則有司綦重譬之棟明堂梁清
廟榱桷豫樟千尋之名材羅于肆下而工師可
擇卽所采者皆液橈空中輪囷離奇規矩弗能
經斧藻弗能施工師亦柰之何哉夫能取者必
能用陸君今日爲良有司能取天下之才矣他
日履台握斗進退庶官以弼成我 聖天子之
治將不爲賢宰相矣乎是又可占已詩曰予以
采繫于澗之中予以用之公侯之宮陸君以之
又曰思皇多士生此王國王國克生維周之楨

濟濟多士文王以寧我明以之

送楊子任序

士君子窮足以樂斯達足以行心志匪曠形骸
匪適標格匪勝名理匪暢羈愁恚對冰炭相搏
衡門之下若拘囚然斯亦奚足與有為耶東方
生云築土爲室編蓬爲戶彈琴其中詠先王之
風亦可以樂而忘死矣余性侏宥不耐齷齪守
閭井築居石湖之上悠然以山水禽魚自娛楊
子子任辱與余遊數年矣子任鬪爽駿發絕無
城府醇雅醞藉余神酣焉日與余搜窮巖剔幽

雅宜集九

十五

壑棲古寺攀危磴挾書冊鼎鐙栝區蔭千喬林
之下琅琅諷讀長吟遐嘯聲蒼崕谷或劇談古
人功德照焯名節慷慨輒窮日纏纏弗休罷則
釀酒相勞氣酣耳熱輒自奮他日果得侍明

天子履文石之陛當鯁挺特拔標古人而趨無
容容作轅下駒余所否者有如此酒聞之者或
以爲狂爲僻爲迂余與子任輩樂也子任以嘉
靖辛卯應應天鄉薦北上春官別余于舊隱余
酌之以酒而告之曰子任今果行矣幸無忘石

湖之言

五扣贈別袁子永之

嘉靖乙酉吳郡袁子永之年二十有四領薦應
天第一旣而偕計北上客有觴于道者曰子行
矣應龍天飛颺雲爲翼愴怵忽摩于無極余
焉測子之所際邪願扣子之志汎觀流示華實
殊軌秦粵異轡久要之言徵于遠詣可乎遂言
曰夸夫狗權曲士射利鷙擊鵲起濁世一致取
樂當年奔慾逸駟窮靡極曼以明得意子其蹀
諸素子反視仰膺若無聞者

客曰奮跡南紀蜚聲紫闥

天子及坐羣公扣

雅宜集九

十六

謁射策彤墀爛若星月雄壓九服縮頸吐舌高
步玉堂致身截薛履台踐斗唾手可掇請爲子
祝炙手附熱袁子曰遐舉乘風顯宦待時余何
心哉

客曰星緯曜天川嶽炳地哲人含靈金精玉思
總統前聞妙握能事虎觀增光石梁長價掃蕩
雕蟲力振大雅一言九鼎百代凌跨茫茫周秦
高視不下淵雲之徒鎔冶渾化願子登壇取威
定霸袁子色喜曰華矣雖然僕願食其實也

容曰經緯六符均調八氣大廈構天蒙海仰庇

玄澤滂流仁風遐被翊我昌明勒功金匱子孫
黎民尚亦有利君子樂之是謂得志辭未及終
而袁子曰善

客曰太山峩峩蔚彼孔林載登其堂石落瑤琴
欲往從之道阻且深東望徂徠實勞我心願子
停輶爲我躊躇竹簡璧書庶幾啓予勿謂聖遠
人抱玄珠袁子奮然曰美哉言乎蔑以加矣山
有木工則度之我有心客則獲之請綴厥詞以
爲我規投文于囊而車騰馬馳矣

雅宜山人集卷九

雅宜九

一七

雅宜山人集卷十

明吳郡王寵撰

雜文

明故承直郎應天府通判祝公行狀

曾祖煥文贈山西布政司左叅議

祖顥山西布政司右叅政

父瓚

公姓祝氏諱允明字希哲蘇之長洲人也祝之先出古太祝以官氏或曰武王封黃帝之後于祝蓋以國氏也春秋時稍見於鄭衛漢有九江

入雅集一

祝生歷唐宋多名士而江閩之祝最著其籍長洲也自元大德元祐間有碧山府君者由松江來爲漕府經歷陞平江路總管有五丈夫子季九鼎因家焉生子潛潛生景彰景彰生煥文煥文生顥明正統間起家進士官給事中累陞山西布政司右叅政生瓚娶兵部尚書華蓋殿大學士武功伯徐公有貞女生公生有殊質絕倫五歲作徑尺大字讀書過目不忘九歲病瘍寢處有古詩一編因徧和之名已隱起稍長益閱肆博洽其于書自六經子史外玄詮釋典裨官

小說之類無所不通既天才卓犖橫從四益重
以內外二祖咸當代魁儒龔錯夾持浸漬穠沃
覃思發藻虎躍龍翔蔚然名家起追百代太僕
少卿李公應禎風裁峻整慎與可人時以中書
舍人奉使過吳妻之子焉弘治壬子王文恪公
典文南畿公遂膺薦文恪以得公爲華累試南
官輒不利然聲實益恢典述崇積閉戶掃轍萬
言騰涌儒林傳譯寶于隨和當道奇其才將特
薦預史事公以獵資僥榮不屑也又數年選知
廣東興寧縣興寧民尚譁訐訟牒列午公至懲

其一二尤無良者姦黠斂迹故多盜竄處山谷
時出焚劫爲民害公設方略捕之一旦獲三十
餘輩梃鼓不警土俗婚姻喪祭多違禮疾不迎
醫而尚祈禱公皆爲條約禁止暇則親蒞學官
進諸生課試講解嶺之南彬彬嚮風矣嘗攝令
南海治之如興寧丙子己卯再鄉試公皆叅典
文衡得士之盛與有勞焉在嶺南幾五年以當
道劾薦陞應天府通判專督財賦公悉力經總
民不擾而事集居無何乞身歸築室吳城日華
里益事著述洞觀天人或放浪山水間儵然終

也書法上軌鍾王下視近代晚歲益出入變化
莫可端倪酒酣縱筆神鬼怪幻墨客填門購之
厚直以嘉靖丙戌十二月二十七日卒距其生
爲天順庚辰十二月六日春秋六十有七妻李
氏封孺人子男二人曰續由進士官給事中累
陞陝西按察司副使次側出幼未名女一人嫁
潮州府經歷王穀禎孫女三人公爲人簡易佚
蕩不耐齷齪守繩法或任性自便目無旁人然
默而好深湛之思濡毫展卷游心玄間實衆雜
逕凝神反視川奔雲爛捷若宿構殆天所殊畀

平生平雖湛浮不羈亦以濩落難偶大觀道遇
傲睨當時軼出塵壒非可與拘方之士道也母
徐夫人歿事繼母陳極盡誠孝與人交坦坦無
他腸延獎後進不憚折行尤不喜蓄蔽咄嗟揮
霍囊土金帛若其經緯術略局于薄宦曾不僅
試莫能殫述端可慨已所著有祝子通若干卷
祝子罪知若干卷祝子雜若干卷蠶衣一卷浮
物一卷成化間蘇材小纂若干卷野記若干卷
語怪若干卷語怪四編若干卷江海殲渠記一
卷金石契一卷興寧志五卷詩文集六十卷後

集若干卷寵不佞辱公知愛最深輒與其子憲
副君叅撫遺行一二以備采擇辭不詮次莫可
發揚功德惟大君子賜之銘以傳世信後幸甚
謹狀

方齋袁君室韓孺人行狀

君諱彞字臣嚳吳邑人曾祖諱某祖諱某考諱
某母俞氏生母趙氏君少警敏授書史輒不難
背誦師里儒張南伯先生同游者無慮百輩獨
斲出不羣家素儒伯氏教諭君尤踔厲自喜乃
弗售君計門戶支拄棄去卽賈服甫冠失怙殖

雅集十

四

滋落君與其季懷雪君兩孱相持抱掃地赤立
侮訶日杳拮据有無外彌內縫茹荼履葛矢以
克宗奉趙氏尤謹毛瓊事弗吝弗敢行善先意
色養母子洩洩樂也久之益厚葺堂構整秩里
中誦之然弗與弟析白首彌籬中歲諸子挺發
皆童壯絕姿珠駢玉列驚異長老君禮謁鉅人
名師益廣蓄古圖書傳記羣之閑館豐之鼎儀
息游肄讀各有次所君所居爲吳利區率些訾算
角遂鶩其奇羸不大競禮讓文術君獨楚楚好
修矩閑尺檢儼以典雅自將數過從四方賢豪

士人稱述名言故實慷慨急難纏纏弗能休人有過輒面折不作泐忍態人故目之曰方齋子好吟咏頗識奇字嘗仕爲崑山醫學訓科尋謝去晚歲結里社以道義相勗月一再集雅歌投壺雍容醞藉方意其遐享而遽以死也悲夫孺人諱某姓韓氏父彥哲官德州同知母蔣氏年十九歸于袁生而疑厚愷祥稱名家女事舅姑孝處妯娌和方齋君與其季友愛雅稱吳中搗柔將美孺人與有力也體素羸多疾內政斬斬弗少弛教諸子慈不愆義初方齋得瘍疾危孺人憂之五日不食以嘉靖庚寅二月十七日死方齋疾益篤以五月二十三日亦死兩衾相繼婚友匍匐驚赴皆哭之出涕曰二善人亡矣嗚呼痛哉方齋生成化戊子二月廿二日享年六十有三孺人生成化乙酉十月廿二日享年六十有六子二人長卽袞領應天府戊子鄉薦娶盧氏次裘吳縣儒學生娶陳氏女四人適周孝沈山范相一尚未字孫男二人夢麟夢鯉女二人尚幼寵與袞同閨兩家世相驩家大人視方齋君兄也於寵爲丈人行諸子辱朝夕游往來

門屏甚狎悉其行不誣君與孺人雖不究遐齡
高朗令終逝矣同婦子姓駿發咸抱國器何憾
矣衮裘崩裂摧頓痛毒彌結豈爲二老人勤一
生以迪子迄享其成而連以不祿卽鍾鼎之養
奚何逮焉此其心殷殷莫解可哀矣衮裘卜以
辛卯十二月十七日葬寶華山先塋之次以孺
人祔惟先生憐而賜之銘以揭二老人之懿行
以慰衮裘之悲使永永托不朽卽衮裘亦何憾
焉謹狀

太學生吳君墓志銘

不雅集

六

嘉靖二年九月十五日太學生吳君卒歛之三
月得其年十一月六日葬薦福山感慈塢之原
先是君顧言曰以王寵銘寵與君居同閭也君
齒列丈行寔子弟畜我晚更折年輩取下日亟
過從訖數年雅相驩甚君生平名能交鉅人偉
儒自結髮游悉琅琅可數天下有聲者也寵孱
稚懼爲君羞而獨以其死累余其曷敢辭君諱
權字次明世吳人也高祖可安鳳翔府同知曾
祖伯經太醫院醫士祖澄父朴字世文母周氏
繼王氏盧氏世文君無子選羣從中立君爲後

幼而朗澈受易於賀其榮先生弱冠進隸學官
爲弟子部使者最其文簡之廩食數薦京師卽
數弗利以年資入貢太學未卒業而死君綜博
信古耻齷齪事經生佔畢爲文簡奧精深刻去
枝蔓弗以媚時詩清越可誦書法宗顏魯公尤
善鑒古器物書畫飲酒博諳輒纏纏談所經見
奇譎瓌麗有味乎其言之也聞佳山水奮袂導
往疊俎採肉頤指而撰雖老以儒窮而賓筵狼
藉謠舞擊箏乃有豪貴人態娶李氏繼錢氏子
男二人長增娶賀氏先君卒次封聘楊氏皆錢
出女一人嫁聞詩李出孫男一人支才五歲距
其生爲成化丙戌十月九日春秋五十有八君
任曠不拘酒費外未嘗問家人生產死而弱息
纍纍無以朝夕天旣嗇其身而忍不豐其後乎
則涕爲之銘銘曰

德則孔嘉而命弗加而年弗遐顛天乎累嗟兒
呱婦鬢攀彼靈車天曷劉斯尚綏有家

序班湯公合葬墓志銘

寵與湯君儒暨其子盤均隸博士爲弟子湯君
雅馴闇闇內修人也盤駮踔父子並著名字先

是儒喪其父鴻臚公卜葬堯峯未有銘后十年
喪其母鄭碩人將合葬乃自爲狀謁銘於寵寵
讀其書則喟然而嘆曰夫文猶水乎水無源潢
潦爾矣文無自謬悠爾矣夫文猶水乎湯氏再
世藝文朗秀而斐則先鴻臚之自也鴻臚公世
吳人諱珪字文潔別號素軒雅善詞翰嘗以詩
謁徐定國定國異之 純皇帝時定國推轂爲
鴻臚寺序班直 文華殿光顯矣曆文華以親
老弃其官歸性篤孝親沒尤嚴烝嘗享年七十
有七碩人曾長洲諱安字玅安婉若而嫵相鴻

翁壽十

八

臚公爲好速青年八十有七生子一儒吳縣學
生娶陸氏女二嫁賀放計舅孫男二盤領應天
辛卯鄉薦娶陸氏孫女一嫁陸鏗曾孫男一元
曾君子謂鴻臚公於是乎君子矣以親故靡_纒
纒鞞儻然卷懷卒以遺其後人詩曰孝子不匱
永錫爾類鴻臚公有焉鴻臚之父濱號順菴大
父彥祥贈大興縣尹母袁碩人公本袁出卽袁
碩人之猶子也順菴翁乞以爲子生正統甲子
閏七月十六日卒正德庚辰十二月二十四日
碩人父信母盧氏生甲子八月二十日卒嘉靖

庚寅十月二十日葬之日爲壬辰十二月廿九日銘曰

業業文華三光紫微載筆入侍瓊珮朱衣亦旣華止言造其歸有懷二人寧耽瑣闥發不盡藏殖祉彌昌廼昌厥胤球玉琳琅烝烝鴻臚淵畜流光我作銘詩勒之玄堂尚後有徵千禩考祥張君汝益妻李孺人墓志銘

嘉靖己丑四月庚寅上海張君汝益喪其妻李孺人卜以卒之年十二月甲申葬曹烏涇之原祔先姑氏兆謁銘於寵維汝益與寵世雅善寔

續寶齋

九

耳悉孺人之賢不誣迺按其兄祠部君宗文所爲狀叙而銘之孺人諱素明世松之華亭人曾祖謙祖常父東封祠部主事母戴安人幼則疑重寡言笑父母特愛之選所歸得少叅張公冢子鳴謙汝益氏旣歸事姑陸恭人及少叅公之母潘孺人肅有婦道時少叅公令鄱陽潘老弗能俱留孺人侍少叅公喜曰吾弗能躬養吾母得吾婦侍無憂矣無何陸卒哭之盡哀獨奉太孺人操家斬斬有節法少叅公宦遠無內顧心繼陸以孔孺人事之如陸侍潘凡十載潘卒

人哀之亦如陸少叅公歷宦澤潞湖湘間孺人問訊饋遺使道路相望公既歸老孺人益專意養及臥疾夫婦相與悲號醫禱無不至踰一年衣不解脫夕不假寐公卒奉孔恭人尤篤孔得疾侍婢莫敢嚮邇孺人親爲洗滌弗獻孔卒孺人以勞邁疾越七月竟死哀哉孺人平居有禮事少叅公之弟與其妻皆如舅姑禮相其夫事不可多所贊決處夫之弟與其妻歷二十載無忤言其賢類如此寵結髮與汝益交汝益種學績行高自對立以丙子領鄉薦將顯名當世

雜集一

寵每惡焉退見其子仕才弱冠也補博士弟子尤俊朗可念則孺人之所以相厥夫迪厥子其賢又可徵也已孺人生成化丁未十月三日年四十有三生男五人長即仕次化儲引歲燕貽女一人受姚蕃聘銘曰

婉婉有儀高門于嬪事我三姑偃僂屈身左右君子爲時聞人亦旣多男有瑤有珉胡命弗遐汔顯而屯尚有褒貶賁爾幽窆

從母朱碩人墓志銘

吾從母朱碩人嫁于梁爲米溪君之配年七十

有七而卒吾母同產兄弟五人皆出我外大父翁妣陸氏碩人最長吾母季也吾母年三十有七而亡吾時童髻未甚哀也稍長始知悲慕每自痛生平不知有母子之樂見人母子慈戀嫗煦相保持未嘗不愴然心摧也獨時時見碩人儀容聲咳髣髴吾母之存而今又已矣吾痛曷有既耶碩人初歸梁方赫盛賓客鼎食水溪踈跪自便不甚事事碩人囊之外內斬斬有理累乳皆女不宜男側室竟生二子晚歲水溪君卒碩人依季女以居益精肉典日掃一室焚香禮

佛口不茹葷足不闖戶如是者數十年二子長軋娶某氏早卒次子坤娶某氏生子某碩人愛之如已出坤事碩人如所生母子雖析處慈孝訢訢如也女三長適劉某次適顧言碩人所依以居者甚得子婿禮某等將以某月某日奉碩人樞安厝于某鄉合水溪君兆寵爲之銘銘曰莫莫葛藟施于樛木洵美碩人綏此百福克有令子亦既有孫本支蕃昌以充梁門我銘其幽以詔後昆

弘治間故禮部尚書兼翰林學士謚文定吳公
以天子宮師掌制內閣道德文章伏天下天
下縉紳士大夫之欲銘功德爰聲光者踵交躡
于門然其家一如未貴時不翁翁熱雖文定之
教使然乃子弟之賢可徵已嗣業視文定爲伯
父尤名能守家法而文采醞藉弗墜益彰稍束
髮卽屬其碩士秀民以嬉磨礱浸灌務敦儒素
視聲勢烜赫一切掃刮絕去簡夷混同無賤貴
皆可詡誦逮文定卒不覺有絲毫異嗚呼亦賢
矣哉世以氣力相取下席有尺寸之廢雖平居
故歡比反眼若不相識撞搪凌轢以爲快樂者
皆是也及一旦失勢奪怙則更竄縮避毒迺不
若齊民焉嗚呼是特反覆手耳日相環於天下
而人不悟顧蹈襲爲常何哉聞嗣業之風亦可
以自媿矣嗣業美風儀倩盼而髯鬢停玉立儼
若僊輩然性逸曠喜自便飲酒舞歌履屐交錯
裊盧咄嘯罰籌如蝟連日夜不厭卒以此得疾
死死時年四十八余少交嗣業淺嗣業割爲余
盞哭之過時而悲弔之以文曰握手醉言肉肺
肝以相示也簡禮任率恣詎謂以爲樂也挾日

必合合乃忘其所之也斯人則亡疇復得夫此類也二孤纍纍孰撫其遺也偉矣簪纓孰振其宗也落冕浮沈嵇阮爾徒也蛟龍岌纏頡斯爾逼也腥鱗腐鼠臭穢彼類也嗚呼嗣業何日而忘也

吳增哀辭

吳增吳人也父燿字次明吳爲吳望姓業儒醫次明種學績行能文辭所與游盡名人偉儒增其冢子也初次明生子連弗育幾數乳乳增輒育稍長皙白而豐蘄然見頭角望知爲名宗兒

也旣家世流風厥父更踔厲弘肆實言溢座狼籍文采增則內師外沃浸耳注目勿訓以迪秩秩自將朗潔始好稍離保媪弗弄弗媮人咸舉手賀曰次明子後後乃秀無憾也同閨賀博士放薦以女吳賀居共堵且睦賀無子強增以婦授室一年而死遺孤甫七月嗚呼哀哉余悲次明之始于艱而終不得其倚也痛增之洵慧而夭折也余視次明丈行次明折年輩以相取下故得驩父子間而今又交傷之也作哀辭以遺之以舒其悲思以昭增德云鸞皇矯矯苒巢有

雖毛羽蕤蕤兮五色敷鳴呼增兮抱繡襦髮漆
黑兮眉目殊婚友嘖嘖兮振爾吳瑤環瑜珥兮
庭下趨一日不見兮將誰呼有兒在室兮泣呱
呱爾父爾母兮獨何辜十有七兮即長途顛天
靡從兮五內割修短舛錯兮罔賢愚福禍無端
兮理則迂魂飄飄兮竟何徂骨肉在茲兮將誰
徒死者其已兮不可俱割哀忍痛兮善自扶庶
亦不亡兮視此孤

張先生傳

張先生者吳閭門里人也吳爲東南會閭則扼

要據便輻湊天下水土百物其丈夫習化居罕
文而多薄先生長于市人獨深藏好書不耐閭
里浮沉故亦高費縱不問生產作業坐一室左
右筐篋而校摩之假易所無輒手自謄寫攻苦
食淡洋洋如也家嘗治雷工騎榮糞掃先生筆
于檐下坐自如子適來請之延愕起其沈精弗
撓類此居無何或挾之商于蜀先生奇其行心
獨樂之起東陲西遡岷江幾萬里往來登覽悉
論纂其山川風土之勝橐中裝空無一錢還尤
篤孝友垂白饗祭未嘗不淚霑衣也弟頗齠時

作諛言輒解以和兩人終不得盛氣語大抵朴
茂醇篤類古之長者以其學教授里中門下積
十數百人有疑難走往質之卽刺刺語弗能休
或抽其架上書指示無不滿意去我冠獵纓蓋
儼然稱師者幾十餘年後生小人亦頗嚴憚焉
年七十九卒先生名翼字南伯云

贊曰自周官法壞而閭師之職廢率桀鰲無耻
者充焉豈其人哉豈其人哉若先生者殆古所
謂三老孝弟者與明王在上可以籩豆于庠矣
余故撫其行義著于篇

張琴師傳

雅宜集十

一五

張琴師吾同閩人也楠其名大本其字大本無
它長獨於琴則專握門戶浙東西之操縵者咸
奔走之名琅琅聞江湖間也然不大業家年五
十四以窮死悲夫大本嘗謂余言始習琴於陸
墓張氏陸墓張氏吳之取名能琴者也大本羈
貫而操張氏師年已七十餘矣遽曰孺子繼我
孺子繼我遂倒其譜授之旣乃溼精揉思窮幽
析微宵吟晝揮手與心維儼乎其若幾茫乎其
若迷積之三十年而汪洋恣睢眇眇希夷濁清

疾徐惟我之施鸞虬鏘鳴若或鼓之鬼神嘯啼不可端倪蓋於是而陸墓之傳益恢以奇也豈韓子所謂造其堂而齊其馘者耶嗚呼琴亦藝也古聖人兼焉今之君子不暇焉然其磨礱滄至有類夫學道者之爲吾是以有感也而大本坎壞困躓纏其身以死若造物者尤焉吾是以重有感也今天下名都沃區侯王肺腑游琴其門者如麻出則陪輿入則交舄突梯滑稽軟媚脂韋以私其金錢以席其寵靈而藝不必大本若也聞其名皆嘆惜縮瑟即遇之羞不敢露手乃大本則弛置自便都不識覘伺人飲酒呼歌揚揚如也唯其獨得於中而與世抹殺其窮而死也則宜

贊曰雞鶩爭食靈鳥不顧有嗛其音爰合韶濩洩彼天和師曠往朔洞庭斯張帝聿其怒于搏于鏃棲之故伍琅玕之林崑崙之圃

張鼎用字說

吾師古閩先生張公以明經奧學閎德夷量流聲當道來範我邦三吳秀民茲至雲蒸咸願服儒衣冠肄業館下感道懷和千里風動厥子鉉

玉質象賢歧嶷嶄嶄旦夕在門昵我兄弟禮冠
三加爰字鼎用命寵作說以章祝規乃不獲辭
而爲之叙曰夫鉉之於鼎以貫耳也引重致用
非鉉不舉鉉可忽乎哉周公曰鼎玉鉉貴之也
今夫鼎有耳其隆有腹其容有足其崇巖廊之
下清廟之旁天子省犧宗伯視調以饗上帝以
養聖賢我后之靈上格于天穆穆賓師肅秩禮
筵乾坤清夷九土晏然阿衡元臣扶日察璇匪
唯鼎功鉉有勞焉故黃帝采銅于首山文王眞
位于郊廓萬禩永寶神明相之張君鍾武夷之
靈秉異德之晶敬承我師蒙養以貞不出戶堂
而屹乎重器矣旣乃磨礮乎日月根柢乎仁義
濡漫乎典墳鑄錫乎英傑奮發乎文章時則有
烏獲孟賁扛之明堂軒姬之主有不肅以衮冕
歌以樂章禋郊假廟永爲我光者哉吾固爲張
君願之也是爲祝

四子述壽論

天水胡博士先生吾師可泉大參公之尊翁也
先生嘗宦蜀爲博士挂冠還山若干年矣今茲
歲在戊子齒躋八袞門下士吳郡黃生省曾素

生聚王生穀祥文生彭凡數輩圖獻萬年之觴
于堂下而闕以遼邈也乃相與揚攢讚述各吐
胸臆黃子曰雍州之域土厚水深古稱陸海表
以大華終南朱圉烏鼠之山帶以濁河涇渭之
川表裡經緯阨塞險巖其丈夫多魁壘碩頤山
立而都顛實揚休俟俟弗撓先生宣靈舍和尤
撥厥英詩不云乎終南何有緇有堂君子至止
緇衣繡裳佩玉鏘鏘壽考不忘先生以之是宜
壽袁子曰赫赫駿命物界之幅齋取有餘淫用
不足優哉優哉可以卒歲先生抱王佐之略蓄

曜世之寶韜其景炎弗登于朝浮沉下庠鳴鐸
一隅暮出蚤歸養之脩如深耕而廉穫閑積而
薄發天之蕃錫吾不知其所屆是宜壽王子曰
天降時雨山川出雲江河之潤浸淫九里玄功
冥冥匪人覩聞先生廸成哲嗣作王之楨文惟
國華德寔士程累典大邦出殿雄藩循良之風
扇于東南慕義者謳吟飲德者尸祝考績論烈
烏乎無自哉聞之樹陰德者必荷顯祿其先生
平是宜壽文子曰西北神明之隩厥多僊靈窟
處林棲呼噲吐納蒸之以靈芝潤之以醴泉熙

神練色千歲童顏摠轡乎瑤水之陽弄景乎仙
掌之巔無爲自得體妙心玄先生其蟬蛻塵埃
之外矚然與日月齊光者乎烏可以常算紀寰
哉於是有王生寵者顓蒙偏塞文負無所底聞
四子之論莫能贊辭遂撰次而書之以爲先生
祝

山中荅湯子重書

昨奉教誨鋪揚偉麗怵心劇目信文之爛發者
也且高叙山林之樂推獎不肖似欲趨而納諸
風騷之域自顧惡劣展卷發汗然僕之逃窮伏

不雅宜集十

十九

隩越在草茨心自樂之足下果余亮否也摠髮
以來連不得志于有司樊維楹束動觸四隅似
亦可憤然惟喜曠蕩不耐礙礙身世浮沈其拒
而不受于懷也若隄之障水莫能暴蓄我生不
有命在天戚何益也但家本酤徒生長鄆市入
則楣柱塞目出則蹄足攝履呼籌握算之聲徹
晝夜每一焦煩心腸沸熱以故山水之好倍于
儕輩徜徉湖上樂而忘返莊周言逃蓬藿者聞
人足音則跫然喜僕雖日羣鹿豕壤斷徑絕愈
覺心神俱爽耳且生平無他好頗耽文辭登臨

稍倦則左圖右書與古人晤語縱不能盡解片
言會心莞然獨笑飢而食飽而嬉人生適意耳
須富貴何時誠日夕私賀恐後之不如今也尚
安望哉子重乎非足下誰則知者頃來放浪無
似日增騃蠢漸不覺有官司城府時行村野間
聞閭師里胥行談途議則怛然驚疑他日雖欲
衣冠揖讓更從諸君之列恐跟蹤羸率重爲執
禮者譏笑矣神志散漫言不詮次刺刺亂縷聊
酬來訊不宣

文內翰天池浴日硯銘

不雅宜集十

二十一

恣彼湯泉膏於若木有韞其光羣曜屏伏守谷
抱玄琬琰在匱於文仲子提携天祿

硯銘

紫玉厠玄津沅吐續藻翔龍蚪燭昭代垂元休
矢余志無爾羞

圭墨銘

錫爾玄圭荒彼黑壤

題聞德齋壁

古人謂一丘一壑可以忘世夸者隘之然使醇
白離人機勝焦然坐馳若係逸駟雖徜徉四海

意愈感矣君子內葆而顛實反鑑而天朗解格
而神全虛游而我得斗室千里也奚其隘奚其
隘袁子掃軌靜涵圖史溢棟昆季友朋一時鸞
鷺余嘗游袁子之齋曠焉塵釋方以爲莽蒼之
間也世乃以尋丈度廣隘豈余與子之所廣隘
耶

王履吉墓志銘

嗚呼悲哉王君已矣不可作矣君文學藝能卓
然名家而出其緒餘爲明經試策宏博奇麗獨
得肯綮御史按試輒褒然舉首一時聲稱甚藉

不雅宜集十

十一

隱爲三吳之望三吳之士知君者咸以高科屬
之其真知者謂能肆情詞藝非直經生而已然
皆非君之極致也乃君之志直欲軼古人而逾
之自非通古今周一世不足以充其所受也是
可以一時一郡論哉君資性穎異將以勤誠於
書無所不窺而尤詳於群經手寫經書皆一再
過爲文非遷固不學詩必盛唐見諸論撰咸有
法程余年視君二紀而長君自牛角即與余遊
無時日不見見輒有所著日異而月不同蓋浩
乎未見其止也而豈意其遽疾而死也嗚呼惜

哉君正德初與其兄履約並以僞造選隸學官
媿聲儷迹翹然競爽既而履約舉應天鄉試尋
舉進士而君每試輒斥以年資貢禮部卒業太
學又試又輒斥蓋自正德庚午至嘉靖辛卯凡
八試試輒斥而名日益起從遊者日衆得其指
授徃徃去取高科登顯仕而君竟不隗以死嗚
呼豈不有命哉君高朗明潔砥節而履方一切
時世聲利之事有所不屑俚俗之言未嘗出口
風儀玉立舉止軒揭然其心每抑下雖聲稱振
疊而醞藉自將對人未始言學蓋不欲以所能

尚人故人亦樂親附之性惡喧囂不樂居廛井
少學於蔡羽先生居洞庭三年既而讀書石湖
之上二十年非歲時省侍不數數入城遇佳山
水輒听然忘去或時偃息於長林豐草間含醺
賦詩倚席而歌邈然有千載之思迹其所爲豈
碌碌尋常之士哉是其志之所存必有出於言
語文字之上者曾不得少見於世而僅僅以文
傳而其所傳又出於文場困躓之餘雅非其至
者嗚呼豈不重可惜哉君孝友天至居常能愉
悅其親而順之於道與兄履約少同筆硯食息

起居未嘗少離既各授室而聯姻共食視室處
之時恒倍也君卒時履約方官京師及是以都
御史出鎮鄖陽便道過家以葬君原俾徵明爲
銘君諱寵字履仁後更字履吉別號雅宜山人
父貞以履約貴封中憲大夫太常寺少卿母朱
氏繼母碩氏贈封皆恭人君生弘治甲寅十一
月八日卒嘉靖癸巳四月三十日享年四十娶
徐氏子男一人子陽太學生娶唐氏鮮元伯虎
女孫男一銘曰維慧而明亦藝而貞胡不潰
於成而卒困以衡吁嗟乎其名

不雅集十

十三

前翰林院待詔將仕佐郎兼修

國史長洲文徵明書并書

